

**2008 թվականի հունվար-օգոստոս ամիսներին ՀՀ պետական բյուջեի  
կատարման ամփոփ բնութագիրը<sup>1</sup>**

ՀՀ 2008 թվականի հունվար-օգոստոս ամիսների ընթացքում ՀՀ պետական բյուջեի եկամուտները կազմել են ավելի քան 483.3 մլրդ դրամ, իսկ ծախսերը՝ ավելի քան 469.3 մլրդ դրամ, որոնք ապահովել են ՀՀ կառավարության լիազորությունների շրջանակներում սահմանված իննամսյա ծրագրի համապատասխանաբար 89 և 79.2 տոկոսը: Պետական բյուջեի տարեկան ծրագրային ցուցանիշները կատարվել են եկամուտների գծով՝ 64.1%-ով, ծախսերի գծով՝ 60.1%-ով:

Նախորդ տարվա նույն ժամանակահատվածի համեմատ պետական բյուջեի եկամուտներն ավելացել են 27.1%-ով կամ շուրջ 103.2 մլրդ դրամով<sup>2</sup>: Ընդ որում, 96.1 մլրդ դրամով կամ 31.8%-ով ավելացել են հարկերը և տուրքերը, 8.4 մլրդ դրամով կամ 15%-ով՝ պարտադիր սոցիալական ապահովության վճարները, 2.1 մլրդ դրամով կամ 213.5%-ով՝ պաշտոնական դրամաշնորհները, իսկ այլ եկամուտները (նախկինում՝ ոչ հարկային եկամուտներ) նվազել են 3.4 մլրդ դրամով կամ 16.1%-ով: Արդյունքում եկամուտների կազմում 2.9 տոկոսային կետով աճել է հարկերի և տուրքերի, 0.4 տոկոսային կետով՝ պաշտոնական դրամաշնորհների տեսակարար կշիռը, իսկ պարտադիր սոցիալական ապահովության վճարների և այլ եկամուտների տեսակարար կշիռները նվազել են համապատասխանաբար 1.4 և 1.9 տոկոսային կետով:

Պետական բյուջեի եկամուտների զգալի մասը՝ 79.3%-ը ձևավորվել է հարկային մուտքերի հաշվին, իսկ 20.7%-ը՝ պետական տուրքի (3%), պարտադիր սոցիալական ապահովության վճարների՝ (13.3%), պաշտոնական դրամաշնորհների՝ (0.6%), այլ եկամուտների՝ (3.7%): «Հայաստանի Հանրապետության 2008 թվականի պետական բյուջեի մասին» ՀՀ օրենքի 9-րդ հոդվածի 18-րդ կետին համապատասխան պետական բյուջեում ներառվել են նաև պետական հիմնարկների արտաբյուջետային ֆոնդերի միջոցները, որոնց եկամուտները հաշվետու ժամանակահատվածում կազմել են ավելի քան 10.5 մլրդ դրամ՝ նախորդ տարվա 8.0 մլրդ դրամի դիմաց:

Անցած ժամանակահատվածում ՀՀ պետական բյուջեի հարկային եկամուտները կազմել են շուրջ 383.5 մլրդ դրամ՝ 89.7%-ով ապահովել իննամսյա ծրագիրը և 64.4%-ով՝ տարեկան ծրագիրը: 2007 թվականի նույն ժամանակահատվածի համեմատ հարկային

<sup>1</sup> Պետական բյուջեի եկամուտներում, ծախսերում և պակասուրդի ֆինանսավորման աղբյուրներում ներառված չեն արտաքին աղբյուրներից ֆինանսավորվող նպատակային ծրագրեր իրականացնող գրասենյակներով շրջանառվող միջոցները:

<sup>2</sup> 2008 թվականից ՀՀ պետական բյուջեն կազմվել է «Պետական ֆինանսների վիճակագրություն-2001» (GFS-2001) ձեռնարկի դասակարգմանը համապատասխան, նաև պետական բյուջեում ներառվել է ՀՀ սոցիալական ապահովագրության պետական հիմնադրամի բյուջեն, ուստի նախորդ տարվա հետ համեմատություններում հաշվի են առնվել նշված փոփոխությունները:

եկամուտներն աճել են 33.2%-ով կամ 95.6 մլրդ դրամով<sup>3</sup>: Ընդ որում, գրեթե բոլոր հարկատեսակների գծով արձանագրվել են աճի բարձր տեմպեր, բացառությամբ պարզեցված հարկի:

Հաշվետու ժամանակահատվածում ավելացված արժեքի հարկը կազմել է ավելի քան 198.7 մլրդ դրամ՝ ապահովելով հարկային եկամուտների 51.8%-ը: Նշված գումարից 128.8 մլրդ դրամը ստացվել է ՀՀ սահմանին հարկումից, 69.9 մլրդ դրամը՝ ապրանքների և ծառայությունների ներքին շրջանառությունից: 2007 թվականի նույն ժամանակահատվածի համեմատ պետական բյուջե մուտքագրված ԱԱՀ-ն աճել է 40.8%-ով կամ ավելի քան 57.6 մլրդ դրամով: Ընդ որում, ավելացել են և՛ ներմուծումից, և՛ ներքին շրջանառությունից ստացվող գումարները:

Հաշվետու ժամանակահատվածում ակցիզային հարկի մուտքերը կազմել են շուրջ 29.5 մլրդ դրամ՝ ապահովելով հարկային եկամուտների 7.7%-ը: Մասնավորապես՝ հանրապետություն ներմուծված ենթակցիզային ապրանքների հարկումից ստացվել է շուրջ 21 մլրդ դրամ, որից 10 մլրդ դրամը՝ բենզինի և դիզելային վառելիքի, 8.1 մլրդ դրամը՝ ծխախոտի ներմուծումից: Հանրապետությունում արտադրվող ենթակցիզային ապրանքների հարկումից պետական բյուջեի մուտքերը կազմել են 8.5 մլրդ դրամ, որից 3.9 մլրդ դրամը ստացվել է ներքին արտադրության ծխախոտի իրացումից: Նախորդ տարվա նույն ժամանակահատվածի համեմատ ակցիզային հարկի մուտքերն աճել են 12.9%-ով կամ շուրջ 3.4 մլրդ դրամով, ինչը հիմնականում պայմանավորված է բենզինի, դիզելային վառելիքի, ծխախոտի ներմուծումից և տեղական արտադրության ծխախոտի իրացումից ստացված մուտքերի աճով: Ակցիզային հարկի աճ է արձանագրվել նաև ներմուծվող ակոհոլային խմիչքներից:

Անցած ժամանակահատվածում պետական բյուջեի հարկային եկամուտների 15.7%-ն ապահովվել է շահութահարկի հաշվին՝ կազմելով շուրջ 60.3 մլրդ դրամ: Նախորդ տարվա համեմատ շահութահարկի մուտքերն աճել են 22.7%-ով կամ շուրջ 11.1 մլրդ դրամով, որը հիմնականում պայմանավորված է ոչ պետական կազմակերպությունների, նվազագույն շահութահարկի վճարման պահանջից ելնելով՝ մեկ տոկոս դրույքաչափով վճարումների և ֆինանսավարկային կազմակերպությունների վճարած շահութահարկի աճով:

2008 թվականի հուվար-օգոստոս ամիսներին ՀՀ պետական բյուջե մուտքագրված եկամտահարկը կազմել է շուրջ 34.5 մլրդ դրամ՝ կազմելով հարկային եկամուտների 9%-ը:

<sup>3</sup> 2008 թվականի հարկային եկամուտներում ներառվել են հանքարդյունահանման լիցենզառուների և հանքարդյունահանման հատուկ լիցենզառուների կողմից վճարվող ռոյալթին և կոնցեսիոն վճարները, որոնք 2007 թվականին հաշվառվում էին որպես ոչ հարկային եկամուտներ, հետևաբար 2007 և 2008 թվականների ցուցանիշների համադրելիության նպատակով 2007 թվականի ցուցանիշներում նույնպես կատարվել են համապատասխան փոփոխություններ:

Այն 26.6%-ով կամ ավելի քան 7.2 մլրդ դրամով գերազանցել է նախորդ տարվա նույն ժամանակահատվածի ցուցանիշը: Աճի հիմնական աղբյուր են հանդիսացել աշխատանքային և քաղաքացիաիրավական պայմանագրերի կատարումից ստացված եկամուտները, որոնք շուրջ 6.9 մլրդ դրամով գերազանցել են նախորդ տարվա համապատասխան ցուցանիշը:

Հաշվետու ժամանակահատվածում զգալի աճ է արձանագրվել նաև մաքսատուրքի գծով: Այն կազմել է շուրջ 22.8 մլրդ դրամ՝ 72.3%-ով կամ շուրջ 9.6 մլրդ դրամով գերազանցելով 2007 թվականի նույն ժամանակահատվածի ցուցանիշը և ապահովելով պետական բյուջեի հարկային եկամուտների 5.9%-ը:

Գործունեության առանձին տեսակներից գանձված հաստատագրված վճարները կազմել են շուրջ 12.7 մլրդ դրամ՝ 10.5%-ով կամ 1.2 մլրդ դրամով գերազանցելով 2007 թվականի նույն ժամանակահատվածի համապատասխան ցուցանիշը: Այն հիմնականում պայմանավորված է տրանսպորտային միջոցների գազալցման, առևտրի իրականացման վայր կազմակերպելու, խաղատների գործունեության, հանրային սննդի ոլորտներում գործունեության կազմակերպումից, ինչպես նաև առևտրի իրականացման վայրից դուրս գտնվող խանութների, կրպակների և այլ վաճառատեղերի միջոցով առևտրական գործունեությանից ստացված մուտքերի աճով: Միաժամանակ նվազել են տրանսպորտային գործունեության և վիճակախաղերի կազմակերպման համար գանձված գումարները:

2008 թվականի հաշվետու ժամանակահատվածում ՀՀ պետական բյուջե է մուտքագրվել 4.3 մլրդ դրամ պարզեցված հարկ: Նախորդ տարվա նույն ժամանակահատվածի համեմատ այն նվազել է 29.9%-ով կամ 1.8 մլրդ դրամով՝ պայմանավորված «Պարզեցված հարկի մասին» ՀՀ օրենքում կատարված փոփոխություններով, որոնցով 2008 թվականի հունվարի 1-ից կրճատվել են պարզեցված հարկի գործունեության տեսակները, ինչպես նաև նախատեսվել են սահմանափակումներ առևտրային գործունեություն իրականացնող կազմակերպությունների և անհատ ձեռնարկատերերի համար:

Բնօգտագործման և բնապահպանական վճարներից պետական բյուջեի մուտքերը կազմել են ավելի քան 6.9 մլրդ դրամ՝ 27.6%-ով կամ 1.5 մլրդ դրամով գերազանցելով նախորդ տարվա նույն ժամանակահատվածի ցուցանիշը: Աճը հիմնականում պայմանավորված է օգտակար հանածոների արդյունահանման համար գանձված վճարների, ինչպես նաև այլ պետություններում գրանցված տրանսպորտային միջոցներից ՀՀ օդային ավազան վնասակար նյութեր արտահանելու և շրջակա միջավայրին վնաս պատճառող ներմուծվող սպրանքների համար մաքսային մարմինների կողմից գանձված

բնապահպանական վճարների ավելացմամբ: Միաժամանակ նվազել են ավտոտրանսպորտից արտանետվող վնասակար նյութերի համար գանձված գումարները:

2008 թվականի հաշվետու ժամանակահատվածում պետական բյուջե են մուտքագրվել ավելի քան 13.8 մլրդ դրամ այլ հարկեր: Մասնավորապես, 6.9 մլրդ դրամ են կազմել «Կոնցեսիայի մասին» ՀՀ օրենքով սահմանված ռոյալթին և կոնցեսիոն վճարները, շուրջ 2.6 մլրդ դրամ՝ ճանապարհային վճարները, 2.6 մլրդ դրամ՝ հանրային ծառայությունների կարգավորման պարտադիր վճարները, 1.1 մլրդ դրամ՝ հարկային օրենսդրությունը խախտելու համար «Հարկերի մասին» ՀՀ օրենքով սահմանված տույժերն ու տուգանքները, 544.8 մլն դրամ՝ ՀՀ կառավարությանն առընթեր հարկային պետական ծառայության նյութական խրախուսման և սոցիալական զարգացման ֆոնդի եկամուտները: Նախորդ տարվա նույն ժամանակահատվածի համեմատ այլ հարկերն ավելացել են 72.4%-ով կամ 5.8 մլրդ դրամով, որը հիմնականում պայմանավորված է «Կոնցեսիայի մասին» ՀՀ օրենքով սահմանված վճարումներով:

2008 թվականի հունվար-օգոստոս ամիսներին պետական տուրքի գծով բյուջետային եկամուտները կազմել են շուրջ 14.7 մլրդ դրամ՝ 85.4%-ով ապահովելով իննամսյա ծրագիրը և 65.2%-ով՝ տարեկան ծրագիրը: 2007 թվականի նույն ժամանակահատվածի համեմատ պետական տուրքն աճել է 3.8%-ով կամ 536.6 մլն դրամով, ինչը հիմնականում պայմանավորված է գործունեության որոշ տեսակների լիցենզավորման, օդային տրանսպորտի միջոցով ֆիզիկական անձանց ելքի, ֆիզիկական անձանց տրվող իրավաբանական նշանակություն ունեցող փաստաթղթերի, որոշակի ծառայությունների կամ գործողությունների, ինչպես նաև դատարան տրվող հայցադիմումների ու գանգատների համար գանձվող տուրքերի, համար գանձվող տուրքերի աճով:

2008 թվականի հունվար-օգոստոս ամիսներին պարտադիր սոցիալական ապահովության վճարների գծով բյուջետային եկամուտները կազմել են շուրջ 64.3 մլրդ դրամ՝ 84.9%-ով ապահովելով իննամսյա և 61.3%-ով՝ տարեկան ծրագրերը: 2007 թվականի նույն ժամանակահատվածի համեմատ պարտադիր սոցիալական ապահովության վճարներն աճել են 15%-ով կամ շուրջ 8.4 մլրդ դրամով:

Հաշվետու ժամանակահատվածում ստացվել են շուրջ 3.1 մլրդ դրամի պաշտոնական դրամաշնորհներ՝ 50.8%-ով ապահովելով իննամսյա և 36.1%-ով՝ տարեկան ծրագրերը: Մասնավորապես՝ 150 մլն դրամը տրամադրվել է Ճապոնիայի կառավարության կողմից, շուրջ 118.8 մլն դրամ ստացվել է Մեծ Բրիտանիայի և Հյուսիսային Իռլանդիայի Միացյալ Թագավորության միջև կնքված փոխընթերցման հուշագրի համաձայն Գեղարքունիքի և Տավուշի մարզերում իրականացվելիք դրամաշնորհային ծրագրի շրջանակներում, շուրջ 266 մլն դրամ ստացվել է Հայաստանի Հանրապետության ու Մեծ

Բրիտանիայի և Հյուսիսային Իռլանդիայի Միացյալ Թագավորության միջև ստորագրված աղքատության հաղթահարման նպատակով բյուջեին աջակցության մասին փոխըմբռնման հուշագրի շրջանակներում , ավելի քան 2.3 մլրդ դրամ տրամադրվել է Նիդերլանդների թագավորության կառավարության կողմից, և 177.5 մլն դրամ կազմել են պետական հիմնարկների արտաբյուջետային միջոցները:

Պետական բյուջեի այլ եկամուտները 2008 թվականի հաշվետու ժամանակահատվածում կազմել են ավելի քան 17.8 մլրդ դրամ՝ 110.1%-ով ապահովելով իննամսյա ծրագիրը և 79.3%-ով՝ տարեկան ծրագիրը: Իննամսյա ծրագրի նման կատարողականը հիմնականում պայմանավորված է բանկերում և այլ ֆինանսավարկային հաստատություններում բյուջեի ժամանակավոր ազատ միջոցների տեղաբաշխումից և դեպոզիտներից ստացվող տոկոսավճարների բարձր ցուցանիշով՝ նախատեսված 191.7 մլն դրամի դիմաց ստացվել է ավելի քան 3.7 մլրդ դրամ, ինչպես նաև ՀՀ կառավարությանն առընթեր անշարժ գույքի կադաստրի պետական կոմիտեի ծախսերի նկատմամբ եկամուտների գերազանցումից մուտքերով, որոնք նախատեսված 70 մլն դրամի դիմաց կազմել են 500.1 մլն դրամ: 2007 թվականի նույն ժամանակահատվածի համեմատ այլ եկամուտները նվազել են 16.1%-ով կամ 3.4 մլրդ դրամով: Վերջինս պայմանավորված է 2007 թվականին «Արմենթել» ՓԲԸ-ի հետ կնքված հաշտության համաձայնությամբ վճարված գումարով, որը կազմել էր 4.6 մլրդ դրամ և «Զանգեզուրի ՊՄԿ» ՓԲԸ-ի մասնավորեցման արդյունքում պետական բյուջե փոխանցված գումարով, որը կազմել էր 6.8 մլրդ դրամ: Առանց նշված գումարների 2007 թվականի նույն ժամանակահատվածի համեմատ այլ եկամուտներն աճել են մոտ 2 անգամ կամ ավելի քան 8.0 մլրդ դրամով, որը հիմնականում պայմանավորված է պետական հիմնարկների արտաբյուջետային մուտքերի, բանկերում և այլ ֆինանսավարկային հաստատություններում բյուջեի ժամանակավոր ազատ միջոցների տեղաբաշխումից և դեպոզիտներից ստացվող տոկոսավճարների, օրենքով և այլ իրավական ակտերով սահմանված պետական բյուջե մուտքագրվող այլ եկամուտների, իրավախախտումների համար կիրառվող պատժամիջոցներից ստացվող մուտքերի աճով:

2008 թվականի հունվար-օգոստոս ժամանակահատվածում ՀՀ պետական բյուջեի միջոցների հաշվին կատարվել են 469.3 մլրդ դրամի ծախսեր՝ կազմելով Կառավարության իննամսյա ծրագրի 79.2%-ը: Մասնավորապես՝ 410.1 մլրդ դրամ կազմել են ընթացիկ ծախսերը, 59.2 մլրդ դրամ՝ ոչ ֆինանսական ակտիվների հետ գործառնությունները: Ծախսերի կատարողականի վրա նվազեցնող ազդեցություն է գործել ոչ ֆինանսական ակտիվների ձեռք բերման ծախսերի համեմատաբար ցածր ցուցանիշը, որը կազմել է

61.6%: 2007 թվականի նույն ժամանակահատվածի համեմատ պետական բյուջեի ծախսերն<sup>2</sup> ավելացել են 27.8%-ով կամ 102.2 մլրդ դրամով:

Հունվար-օգոստոս ամիսներին կատարվել է ընթացիկ ծախսերի իննամսյա ծրագրի 82.4%-ը՝ կազմելով ավելի քան 410.1 մլրդ դրամ: Ընթացիկ ծախսերից շուրջ 36.1 մլրդ դրամն ուղղվել է պետական հիմնարկների աշխատողների աշխատավարձերի վճարմանը՝ կազմելով իննամսյա ծրագրի 85.2%-ը: Պարտադիր սոցիալական ապահովության վճարներին տրամադրվել է 2.5 մլրդ դրամ կամ ինն ամիսների ծրագրային ցուցանիշի 70.2%-ը: Ծառայությունների և ապրանքների ձեռք բերմանը պետական բյուջեից տրամադրվել է 80.2 մլրդ դրամ, որը կազմել է իննամսյա ծրագրի 80.1%-ը: Հաշվետու ժամանակահատվածում 7.8 մլրդ դրամ է հատկացվել պետական պարտքի սպասարկմանը՝ կազմելով իննամսյա ծրագրի 86.9%-ը: Մասնավորապես՝ նշված գումարից 5.6 մլրդ դրամ տրամադրվել է ներքին, 2.2 մլրդ դրամ՝ արտաքին պարտքի սպասարկմանը, որոնք կազմել են իննամսյա ծրագրի համապատասխանաբար 87.0 և 86.7 տոկոսը: 2007 թվականի նույն ժամանակահատվածի համեմատ պետական պարտքի սպասարկման ծախսերն աճել են 27.2%-ով՝ հիմնականում պայմանավորված ներքին պետական պարտքի սպասարկման ծախսերի աճով: Հաշվետու ժամանակահատվածում պետական բյուջեից տրամադրվել են շուրջ 15.6 մլրդ դրամ սուբսիդիաներ՝ կազմելով իննամսյա ծրագրի 88.8%-ը:

Պետական բյուջեի ընթացիկ ծախսերի 12.7%-ը կամ 52.1 մլրդ դրամ կազմել են դրամաշնորհները, որից 45.2 մլրդ դրամը (ինն ամիսներին նախատեսվածի 89.4%-ը) պետական հատվածի այլ մակարդակներին տրամադրված դրամաշնորհներն են: Մասնավորապես՝ նշված գումարից շուրջ 14 մլրդ դրամը կազմել են պետական բյուջեից համայնքների բյուջեներին համահարթեցման սկզբունքով տրվող դոտացիաները:

Հաշվետու ժամանակահատվածում պետական բյուջեի ընթացիկ ծախսերի 32.9%-ն ուղղվել է սոցիալական նպաստներին և կենսաթոշակներին, որոնք կազմել են 134.9 մլրդ դրամ կամ իննամսյա ծրագրով նախատեսվածի 84.9%-ը: Մասնավորապես՝ 102.5 մլրդ դրամ է տրամադրվել կենսաթոշակների, 32.3 մլրդ դրամ՝ նպաստների վճարմանը:

2008 թվականի հունվար-օգոստոս ամիսների ընթացքում ՀՀ պետական բյուջեի ոչ ֆինանսական ակտիվների հետ գործառնությունները կազմել են 59.2 մլրդ դրամ կամ իննամսյա ծրագրի 62.5%-ը: Մասնավորապես, 69.3 մլրդ դրամ են կազմել ոչ ֆինանսական ակտիվների գծով ծախսերը և 10.1 մլրդ դրամ՝ ոչ ֆինանսական ակտիվների օտարումից մուտքերը: 2007 թվականի հունվար-օգոստոսի համեմատ ոչ ֆինանսական ակտիվների օտարումից մուտքերը նվազել են 11.3%-ով:

2008 թվականի հունվար-օգոստոս ժամանակահատվածում ՀՀ պետական բյուջեն (առանց արտաքին աղբյուրներից ֆինանսավորվող վարկային ծրագրերի գծով միջոցների

ներհոսքի) կատարվել է ավելի քան 14.0 մլրդ դրամ հավելուրդով՝ ինն ամիսներին նախատեսված 49.7 մլրդ դրամ պակասուրդի դիմաց: Ընդ որում, ֆինանսավորման ներքին աղբյուրները կազմել են 780.2 մլն դրամ՝ նախորդ տարվա -5.9 մլրդ դրամի դիմաց, իսկ արտաքին աղբյուրները՝ -14.8 մլրդ դրամ՝ նախորդ տարվա -7.1 մլրդ դրամի դիմաց: Պակասուրդի ֆինանսավորման ներքին աղբյուրներում շուրջ 12.7 մլրդ դրամ են կազմել փոխառու միջոցներից (արժեթղթերից) զուտ մուտքերը: 47.9 մլն դրամ ուղղվել է մուրհակների մարմանը: 85.9 մլն դրամ տրամադրվել է բռնադատված քաղաքացիներին՝ անհատական բնակարանային շինարարություն իրականացնելու նպատակով: 269.6 մլն դրամ մուտքագրվել է նախկինում տրամադրված վարկերի վերադարձից: Հաշվետու ժամանակահատվածում ավելի քան 12 մլրդ դրամով ավելացել են ազատ բյուջետային միջոցները:

Հունվար-օգոստոս ամիսների ընթացքում պակասուրդի ֆինանսավորման նպատակով Համաշխարհային բանկի կողմից տրամադրվել է 6.4 մլրդ դրամ՝ Աղքատության հաղթահարման աջակցության չորրորդ վարկային ծրագրի շրջանակներում: Արտաքին պարտավորությունների մարմանը հաշվետու ժամանակահատվածում ուղղվել է շուրջ 3.6 մլրդ դրամ, որից 2.84 մլրդ դրամ հատկացվել է Համաշխարհային բանկի աջակցությամբ իրականացվող ծրագրերի գծով պարտքի մարմանը, 561.8 մլն դրամ՝ ԱՄՆ ապրանքային վարկերի մարմանը, 132.5 մլն դրամ՝ Գյուղատնտեսության զարգացման միջազգային հիմնադրամի աջակցությամբ իրականացվող ծրագրերի գծով պարտքի մարմանը և 17.1 մլն դրամ՝ Ֆրանսիայի նկատմամբ ԱԷԿ-ի վառելիքի չոր պահպանման ծրագրի գծով պարտքի մարմանը:

2008 թվականի հունվար-օգոստոս ամիսներին ՀՀ պետական բյուջեից 17.6 մլրդ դրամ միջպետական վարկ է տրամադրվել ԼՂՀ-ին, որը 31.9%-ով գերազանցել է նախորդ տարվա նույն ցուցանիշը: Ֆինանսավորման արտաքին աղբյուրներում Վրաստանին տրամադրված վարկերից ՀՀ պետական բյուջե է վերադարձվել 28.8 մլն դրամ, ապահովելով իննամսյա ծրագրի կատարողականը 100% -ով: